

An ka chonjé, yonn adan prèmyé tèks an woulé lè an té zèlèw kréyòl an lisé Baimbridge sé té ta-w, Man Telchid.

On madanm an té k'ay aprann tout travay i fè pou kréyòl é kilti kréyòl.

Asiré, si a pa té travay a-w é ta dòt ki té avè-w, nou, zèlèw kréyòl a tan-lasa, pa té ké ni chans sizé é aprann kréyòl lékòl.

Ou maké asi toutbiten : maké asi vivasyon a péyi-la, mès é labitid a moun isidan, kwayans é kwayandiz, bon é mové mès nou pé ni... Sé avè zouti ou fè, bon enpé adan nou aprann maké kréyòl.

Nou, tin enpé bèl mo ki té ka tòtòy lèspri an nou. Davwa anplis di aprann maké é li lang-la, nou té ka aprann mo nou potéko janmen tann.

Mwen sé jénérasyon a zèlèw otila kréyòl té ka komansé fè florès oséryé toupatou adan akadémi-la. Nou té onpakèt ki té vlé fè kréyòl. Angajman a-w, sèten pwofèsè nou té ni trapé-y osi, sitèlman yo pa jen dérifizé on zèlèw rantré andidan lékòl a yo, menmsi sal-la té plen kon zé.

Nouchak fè chimen an nou, é mwen an vin pwofèsè kréyòl. Tèks ou maké é wouchach ou fè ka sèvi mwen an travay an mwen jous jòdijou.

An pa sav la ou touvé fòs. Men mès, davwa san konba ou menné, goumé ou goumé, san travay a vou é lésèz, an pa té ké la kontan ka di an pwofèsè kréyòl.

Mèsi pou tousa !

Travay a-w fwitayé,! Nou ka kontinyé é rédé dòt kontinyé chimen-la ou wouvè-la.

Jeffrey Sellin, professeur certifié de créole